

四庫全書

史部

欽定四庫全書

史部
明史卷二百七十六

給事中_臣劉渢覆勘

總校官編修_臣朱鈐

欽定四庫全書

明史卷二百七十四

大學士張廷玉等奉 敕修

列傳第一百六十四

朱大典

王道輝等

張國維

張肯堂

壽向中 吳鍾璽 朱永佑等

曾 櫻

朱繼祚

湯芬等

余 煌

陳函輝

王瑞楠

路振飛

何楷

林蘭友

熊汝霖

錢肅樂

劉中藻
鄭遵謙

沈宸荃

邑子履祥

朱大典字延之金華人世家貧賤大典始讀書為人豪邁登萬曆四十四年進士除章邱知縣天啓二年擢兵科給事中中官王體乾魏忠賢等十二人及乳媪客氏假保護功蔭錦衣世襲大典抗疏力諫五年出為福建副使進右參政以憂歸崇禎三年起故官蒞山東尋調天津五年四月李九成孔有德圍萊州山東巡撫徐從

治中礮死擢大典右僉都御史代之詔駐青州調度兵
食七月登萊巡撫謝璉復陷於賊總督劉宇烈被逮乃
罷總督及登萊巡撫不設專任大典督主客兵數萬及
關外勁旅四千八百餘人合勦之以總兵金國奇將率
副將靳國臣劉邦域參將祖大弼祖寬張韜遊擊柏永
福及故總兵吳襄襄子三桂等以中官高起潛監護軍
餉抵德州賊復犯平度副將牟文綬何維忠等救之殺
賊魁陳有時維忠亦被殺八月巡按監軍御史謝三賓

至昌邑請斬王洪劉國柱詔建治之兵部尚書熊明遇亦坐主撫誤國罷去三賓復抗疏請絕口勿言撫事國奇等至昌邑分三路國奇等關外兵為前鋒鄧玘步兵繼之從中路灰埠進昌平總兵陳洪範副將劉澤清方登化從南路平度進參將王之富王文緯等從北路海廟進檄遊擊徐元亨等率萊陽師來會以牟文綬守新河諸軍皆攜三日糧盡抵新河東岸亂流以濟祖寬至沙河有德迎戰寬先進國臣繼之賊大敗諸軍乘勝追

至城下賊夜半東遁圍始解守者疑賊誘礮拒之起潛遣中使入諭闔城相慶明日南路兵始至國竒等遂擊賊黃縣斬首萬三千俘八百逃散及墜海死者數萬賊竄歸登州國臣等築長圍守之城三面距山一面距海牆三十里而遙東西俱抵海分番戍賊不能出發大礮官軍多死傷李九成出戰相當十一月九成博戰降者洩其謀官軍合擊之馘於陣賊乃曉夜哭賊渠魁五九成有德有時耿仲明毛承祿也及是殺其二帝嘉解圍

功進大典右副都御史將吏陞賞有差是月國奇卒以襄代功圍既久賊糧絕恃水城可走不降及王之富祖寬奪其水門外護牆賊大懼六年二月中旬有德先遁載子女財帛出海仲明以水城委副將王秉忠已亦以單舸遁官軍遂入大城攻水城未下遊擊劉良佐獻轟城策匿人永福寺中穴城置火藥發之城崩官軍入賊退保蓬萊間大典招降始釋甲俘千餘人獲秉忠及偽將七十五人自縊及投海死者不可勝計賊盡平有德

等走旅順島帥黃龍邀擊生禽其黨毛承祿陳光福蘇
有功斬李應元惟有德仲明逸去乃獻承祿等於朝磔
之先一日有功脫械走帝震怒斬監守官刑部郎多獲
罪未幾被執伏誅叙功進大典兵部右侍郎世廕錦衣
百戶巡撫如故八年二月流賊陷鳳陽毀皇陵總督楊
一鵬被逮詔大典總督漕運兼巡撫廬鳳淮揚四郡移
鎮鳳陽時江北州縣多陷明年正月賊圍滁州連營百
餘里總兵祖寬大破之大典會總理盧象昇追襲復破

之急還兵遏賊衆於鳳陽賊始退十一年賊復入江北
謀竄茶山大典與安慶巡撫史可法提兵遏之賊乃西
遁大典先坐失州縣貶秩視事是年四月以平賊踰期
再貶三秩尋叙援勦及轉漕功盡復其秩十三年河南
賊大入湖廣大典遣將救援屢有功進左侍郎明年六
月命大典總督江北及河南湖廣軍務仍鎮鳳陽專辦
流賊而以可法代督漕運賊帥袁時中衆數萬橫潁毫
間大典率總兵劉良佐等擊破之叙賚有差大典有保

障功然不能持廉屢為給事中方士亮御史鄭崑貞等
所劾詔削籍候勘事未竟而東陽許都事發許都者諸
生負氣憤縣令苛斂作亂圍金華大典子萬化募健兒
禦之賊平而所募者不散大典聞急馳歸知縣徐調元
閱都兵籍有萬化名遂言大典縱子交賊巡按御史左
光先聞於朝得旨逮治籍其家充餉且令督賦給事中
韓如愈趣之已而京師陷福王立有白其誣者而大典
亦自結於馬士英阮大鍼乃召為兵部左侍郎踰月進

尚書總督上江軍務左良玉興兵命監黃得功軍禦之
福王奔太平大典與大鉞入見舟中誓力戰得功死王
見禽兩人遂走杭州會潞王亦降大典乃還鄉郡據城
固守唐王聞就加東閣大學士督師浙東踰年城破闔
門死之其時浙東西郡縣前後失守死事者杭州則有
同知王道焜錢塘知縣顧咸建臨安知縣唐自綵紹興
則有兵部主事高岱葉汝愼衢州則有巡按王景亮知
府伍經正推官鄧巖忠江山知縣方召若夫諸生及布

衣殉義者會稽潘集周卜年山陰朱瑋諸暨傳日炯鄞
縣趙景麟浦江張君正瑞安鄒欽堯永嘉鄒之琦其尤
著云王道焜字昭平錢塘人以天啓元年舉於鄉崇順
時為南平知縣遷南雄同知會光澤寇發其父老言非
道焜不能平撫按為請詔改邵武同知知光澤縣事撫
勦兼施境內底定莊烈帝破格求賢盡徵天下賢能吏
撫按以道焜名聞方待命而都城陷微服南還及杭州
失守遂投繯死顧咸建字漢石崑山人大學士鼎臣曾

孫也崇禎十六年進士授錢塘知縣甫之官聞京師陷人情洶洶咸建戢奸宄嚴警備巡按御史彭遇颺以貪殘激變賴咸建調護事寧而民免株連及南都失守鎮江守將鄭彩等率衆還閩緣道劫掠咸建出私財迎犒乃斂威去亡何馬士英擁兵至頃之大將方國安兵亦至咸建謀於上官先期遣使行賂兵乃不入城四鄉多被淫掠城中得無擾時監司及郡縣長吏悉遁竄咸建散遣妻子獨守官不去潞王既降咸建不至尋見執死

之唐自彩達州人為臨安知縣杭州失守自彩與從子
階豫逃山中有言其受魯王敕陰部署為變遂見捕獲
自彩麾階豫走不從竟同死高岱字魯瞻會稽人崇禎
中以武學生舉順天鄉試魯王授為職方主事及紹興
失守即絕粒祈死子朗知父意不可回先躍入海中死
岱聞之曰兒果能先我乎自是不復言數日亦卒葉汝
菴字衡生岱同邑人由舉人為兵部主事聞變與妻王
氏出居桐塢墓所並赴水死王景亮字武侯吳江人崇

禎末登進士仕福王為中書舍人唐王立擢御史巡撫
金衢二府兼視學政伍經正安福人由貢生為西安知
縣唐王起擢知府事鄧巖忠江陵人由鄉舉為推官衢
州破經正赴井死景亮巖忠皆自縊死魯王所遣鎮將
張鵬翼亦死之方召宣城人署江山縣事金華被屠集
父老告之曰兵且至吾義不當去然不可以一人故致
闔城被殃遂封其印冠帶向北拜赴井死士民為收葬
立祠祀焉

張國維字玉筍東陽人天啓二年進士授番禺知縣崇禎元年擢刑科給事中劾罷副都御史楊所修御史田景新皆魏忠賢黨也已陳時政五事言陛下求治太銳綜核太嚴拙者跼蹐以避咎巧者委蛇以取容誰能展布四體為國家營職業者故治象精明而腹心手足之誼實薄此英察宜斂也祖宗朝閣臣有封還詔旨者有疏揭屢上而爭一事者今一奉詰責則俛首不遑一承改擬則順旨恐後倘處置失宜亦必不敢執奏此將順

宜戒也召對本以通下情未有因而獲罪者今則惟傳
天語莫睹拜颺臣同官熊奮渭還朝十日旁措一詞遂
蒙譴謫不可稍加薄罰示優容之度乎此上下宜洽也
其二條請平刑罰溥膏澤帝不能盡用進禮科都給事
中京師地震規弊政甚切遷太常少卿七年擢右僉都
御史巡撫應天安慶等十府其冬流賊犯桐城官軍覆
沒國維方壯年一夕鬚髮頓白明年正月率副將許自
強赴援遊擊潘可大知縣陳爾銘等守桐不下賊乃攻

潛山知縣趙士彥重傷卒攻太湖知縣金應元訓導扈永寧被殺國維至解桐圍遣守備朱士允趨潛山把總張其威趨太湖士允戰死自強遇賊宿松殺傷相當安慶山民桀石以投賊賊多死乃越英山霍山而遁九月賊復由宿松入潛山太湖他賊掃地王亦陷宿松等三縣國維乃募土著二千人戍之而以兵事屬監軍史可法明年正月賊圍江浦遣守備蔣若來陳于王戰却之十二月賊分兵犯懷寧可法及左良玉馬壩遏之復犯

江浦副將程龍及若來于王等拒守諸城並全又圍望
江遣兵援之亦解去十年三月國維率龍等赴安慶禦
賊鄧家店龍軍數千悉沒賊東陷和州含山定遠攻陷
六合知縣鄭同元潰走賊遂攻天長國維見賊勢日熾
請於朝割安慶池州太平別設巡撫以可法任之安慶
不隸江南巡撫自此始也議者欲并割江浦六合俾國
維專護江南不許國維為人寬厚得士大夫心屬郡災
傷輒為請命築太湖繁昌二城建蘇州九里石塘及平

望內外塘長洲至和等塘修松江捍海堤濬鎮江及江陰漕渠並有成績遷工部右侍郎兼右僉都御史總理河道歲大旱漕流涸國維濬諸水以通漕山東饑振活窮民無算十四年夏山東盜起改兵部右侍郎兼督淮徐臨通四鎮兵護漕運大盜李青山衆數萬據梁山濬遣其黨分據韓莊等八閘運道為梗周延儒赴召北上青山謁之言率衆護漕非亂也延儒許言於朝授以職而青山竟截漕舟大焚掠迫臨清國維合所部兵擊降

之獻俘於朝磔諸市兵部尚書陳新甲下獄帝召國維代之乃定戰守賞罰格列上嚴世職酌推陞慎咨題等七事帝皆報可會開封臨河北震動條防河數策帝亦納之十六年四月我

大清兵入畿輔國維檄趙光抃拒螺山八總兵之師皆潰言者詆國維乃解職尋下獄帝念其治河功得釋召對中左門復故官兼右僉都御史馳赴江南浙江督練兵輸餉諸務出都十日而都城陷福王召令協理戎政

尋叙山東討賊功加太子太保廕錦衣衛事吏部尚書
徐石麒去位衆議歸國維馬士英不用用張捷國維乃
乞省親歸南都覆踰月潞王監國於杭州不數日出降
閏六月國維朝魯王於台州請王監國即日移駐紹興
進國維少傅兼太子太傅兵部尚書武英殿大學士督
師江上總兵官方國安亦自金華至馬士英素善國安
匿其軍中請入朝國維劾其十大罪乃不敢入連復富
陽於潛樹木城綠江要害聯合國安及王之仁鄭遵謙

熊汝霖孫嘉績錢肅樂諸營為持久計

順治三年五月國安等諸軍乏餉潰王走台州航海國
維亦還守東陽六月知勢不可支作絕命詞三章赴水
死年五十有二

張育堂字載寧松江華亭人天啓五年進士授濬縣知
縣崇禎七年擢御史明年春賊陷鳳陽條上滅賊五事
俄以皇陵震驚疏責輔臣不宜作秦越之視帝不問出
按福建數以平寇功受賚還朝言監司營競紛紜意所

欲就則保留久任意所欲避則易地借才今歲燕秦明
歲閩粵道路往返動經數千程限稽遲多踰數月加一
番更移輒加一番擾害帝是其言十二年十月楊嗣昌
出督師肅堂奏言從古戡亂之法初起則解散勢成則
剪除未有專任撫者今撫臣膺新命而出賊必仍用故
技佯搖尾乞憐而失事諸臣冀掩從前敗局必多方熒
惑仍進撫議請特申一令專務剿除有進招撫說者立
置重典帝以偏執臆見責之十四年四月言流寇隳城

破邑往來縱橫如入無人之境此督師嗣昌受事前所未有目前大計在先釋嗣昌之權疏入而嗣昌已死十二月復言今討賊不可謂無人巡撫之外更有撫治總督之上又有督師位號雖殊事權無別今楚自報捷豫自報敗甚至南陽失守禍中親藩督師職掌安在試問今為督師者將居中而運以發蹤指示為功乎抑分賊而辦以焦頭爛額為事乎今為秦保二督者將兼顧提封相為苛角之勢乎抑遇賊追剿專提出境之師乎今

為撫者將一稟督師之令進退惟其指揮乎抑兼視賊勢之急戰守可以擇利乎凡此宵縻一切置不問中樞冥冥而決諸臣瞶瞶而任至失地喪師中樞糾督撫以自解督撫又互相委以謝愆而疆事不可問矣帝納其言下所司詳議十五年請召還建言譴謫諸臣乃復給事中陰潤李清劉昌御史周一敬官宵堂遷大理丞旋擢右僉都御史巡撫福建總兵鄭鴻逵擁唐王聿鍵入閩與其兄南安伯芝龍及宵堂勸進遂加太子少保吏

部尚書曾櫻至言官請令櫻掌吏部乃令宥堂掌都察院宥堂請出募舟師由海道抵江南倡義旅而王由仙霞趨浙東與相聲援乃加少保給敕印便宜從事芝龍懷異心陰沮之不成行

順治三年王敗死宥堂飄泊海外六年至舟山魯王用為東閣大學士八年

大清兵乘天霧集螺頭門定西侯張名振奉王航海去屬宥堂城守城中兵六千居民萬餘堅守十餘日城破

肖堂衣蟒王南向坐令四妾一子婦一女孫先死乃從
容賦詩自經時同死者兵部尚書李向中禮部尚書吳
鍾璣吏部侍郎朱永佑安洋將軍劉世勛左都督張名
揚又有通政使會稽鄭遵儉兵科給事中鄞縣董志寧
兵部郎中江陰朱養時戶部主事福建林瑛蘇州江用
楫禮部主事會稽董元兵部主事福建朱萬年長洲顧
珍臨山衛李開國工部主事長洲顧中克中書舍人蘇
州蘇兆人工部所正鄞縣戴仲明定西侯參謀順天顧

明楫諸生福建林世英錦衣指揮王朝相內官監太監
劉朝凡二十一人李向中鍾祥人崇禎十三年進士授
長興知縣調秀水福王時歷車駕郎中蘇松兵備副使
唐王以為尚寶卿閩事敗避海濱魯王監國召為右僉
都御史從航海進兵部尚書從至舟山及是破大帥召
向中不赴發兵捕之以衰絰見大帥呵之曰聘汝不至
捕即至何也向中從容曰前則辭官今就戮耳吳鍾鑾
字鑾雅武進人崇禎七年進士授長興知縣以旱潦徵

練餉不中額謫紹興照磨踰年移桂林推官聞京師變
流涕曰馬君常必能死節已而世奇果死福王立還禮
部主事抵南雄聞南都失轉赴福建痛陳國計魯王起
兵以鍾巒為禮部尚書往來普陀山中

大清兵至寧波鍾巒慷慨謂人曰昔仲達死璫禍吾以
諸生不得死君常死賊難吾以遠臣不得從死今其時
矣乃急渡海入昌國衛之孔廟積薪左廡下抱孔子木
主自焚死仲達者江陰李應昇鍾巒弟子忤魏忠賢死

黨禍者也朱永佑字爰啓崇禎七年進士授刑部主事
改吏部罷歸事唐王後至舟山城破被執願為僧不許
乃就戮名揚名振弟城破母范以下自焚者數十人朝
相聞城失守護王如陳氏貴嬪張氏義陽王妃杜氏入
井用巨石覆之自刎其旁開國母瑛明楫妻皆自盡

曾櫻字仲含峽江人萬曆四十四年進士授工部主事
歷郎中天啟二年稍遷常州知府諸御史巡鹽倉江漕
及提學屯田者皆操舉劾權文牒日至櫻牒南京都察

院曰他方守令奔命一巡按獨南畿奔命數巡按請一
切戒飭罷鉤訪取贖諸陋習都御史熊明遇為申約束
焉櫻持身廉為政愷悌公平不畏強禦屯田御史索屬
吏應劾者姓名櫻不應御史危言恐之答曰僚屬已盡
無可糾止知府無狀因自署下考杜門待罪撫按亟慰
留乃起視事織造中官李實迫知府行屬禮櫻不從實
移檄以爾汝侮之櫻亦報以爾汝卒不屈無錫高攀龍
江陰繆昌期李應昇被逮櫻助昌期應昇貲而經紀攀

龍死後事為文祭之出其子及僮僕於獄宜興毛士龍
坐忤魏忠賢遣戍櫻諷士龍逃去上官捕其家人賴櫻
以免武進孫慎行忤忠賢當戍櫻緩其行忠賢敗事遂
解崇禎元年以右參政分守漳南九蓮山賊犯上杭櫻
募壯士擊退之夜搗其巢殲殆盡士民為櫻建祠毋
憂歸服闋起故官分守興泉二郡進按察使分巡福寧
先是紅夷寇興泉櫻請巡撫鄒維璉用副總兵鄭芝龍
為軍鋒果奏捷及劉香寇廣東總督熊文燦欲得芝龍

為援維璉等以香與芝龍有舊疑不遣櫻以百口保芝
龍遂討滅香芝龍感櫻甚十年冬帝信東廠言以櫻行
賄謀擢官命械赴京御史葉初春嘗為櫻屬吏知其廉
於他疏微白之有詔詰問因具言櫻賢然不知賄所從
至詔至閩巡撫沈猶龍巡按張有堂閱廠檄有奸人黃
四臣名芝龍前白曰四臣我所遣我感櫻恩恐遷去令
從都下訊之四臣乃妄言致有此事猶龍有堂以入告
力白櫻寃芝龍亦具疏請罪士民以櫻貧為醵金辦裝

耆老數千人隨至闕下擊登聞鼓訟寃帝命毋入獄俟
命京師削芝龍都督銜而令櫻以故官巡視海道尋以
銜永多寇改櫻湖廣按察使分守湖南給以敕故事守
道無勅帝特賜之時賊已殘十餘州縣而永州知府推
官咸不任職櫻薦蘇州同知晏日曙歸德推官萬元吉
才兩人方坐事罷官以櫻言並起用櫻乃調芝龍勦賊
賊多降一方遂安遷山東右布政使分守東萊十四年
春擢右副都御史代徐人龍巡撫其地明年遷南京工

部右侍郎乞假歸山東初被兵巡撫王永吉所部濟甯東三府州縣盡失匿不以聞兵退以恢復報而櫻所部青登萊三府失州縣無幾盡以實奏及論罪永吉反擢總督而櫻奪官逮下刑部獄不十日而京師陷賊釋諸囚櫻乃遁還其後唐王稱號於福州芝龍薦櫻起工部尚書兼東閣大學士無何令掌吏部尋進太子太保吏部尚書文淵閣王駐延平令櫻留守福州

大清兵破福州櫻挈家避海外中左衛越五年其地被

兵遂自縊死

朱繼祚莆田人萬曆四十七年進士改庶吉士授編修
天啓中與修三朝要典尋罷去崇禎初復官累遷禮部
右侍郎充實錄總裁給事中葛樞言繼祚嘗纂修要典
得罪清議不可總裁國史不聽繼祚旋謝病去起南京
禮部尚書又以人言罷去福王時起故官未赴南都失
唐王召為東閣大學士從至汀州王就禽繼祚奔還其
鄉魯王監國繼祚舉兵應王攻取興化城既而

大清兵至城復破繼祚及參政湯芬給事中林眉知縣
都廷諫並死之芬字方侯嘉善人崇禎十六年進士福
王時為吏可法監紀推官唐王以為御史尋以監司分
守興泉道城破緋衣坐堂上見殺眉字小眉繼祚同邑
人由進士為吳江知縣蘇州失歸仕唐王至是自縊死
廷諫杭州人莆田知縣王自監國二年正月至長垣迨
次年正月連克建寧邵武興化三府福寧一州漳浦海
澄連江長樂等二十七縣軍聲頗振及是得者復失海

澄失知縣洪有文死之永福失邑人給事中鄢正鶚御史林逢經俱投水死長樂失邑人御史王恩及服毒死妻李氏同死建寧失守將王祈巷戰不勝自焚死

余煌字武貞會稽人天啓五年進士第一授翰林修撰與修三朝要典崇禎時以內艱歸服闋起左中允歷左諭德右庶子充經筵講官給事中韓源劾禮部侍郎吳士元御史華琪芳及煌皆與修要典宜斥帝置不問煌疏辭帝復溫旨慰諭之戶部尚書程國祥請借京城房

祖煌爭不可乞假歸遂丁外艱服除久不起魯王監國
紹興起禮部右侍郎再起戶部尚書皆不就明年以武
將橫甚拜煌兵部尚書始受命時諸臣經營高爵請乞
無厭煌上言今國勢愈危朝政愈紛尺土未復戰守無
資諸臣請祭則當思先帝烝嘗未備請葬則當思先帝
山陵未營請封則當思先帝宗廟未享請廕則當思先
帝子孫未保請謚則當思先帝光烈未昭時以為名言
大清兵過江王航海遁六月二日煌赴水舟人拯起之

居二日復投深處乃死陳函輝字木叔臨海人崇禎七年進士授靖江知縣為御史左光先劾罷北都陷誓衆倡義會福王立不許草澤勤王乃已尋起職方主事監軍江北事敗歸魯王擢為禮部右侍郎從王航海已而相失哭入雲峰山作絕命詞十章投水死

王瑞柟字聖木永嘉人天啓五年進士授蘇州推官兼理兌運軍民交兌恒相軋啓釁瑞柟調劑得宜歲省浮費三萬金上官為勒石著令貴人弟奸法執問如律其

人中之當道將議調遂歸崇禎七年起河間推官遷工部主事調兵部轉職方員外郎擢湖廣兵備僉事駐襄陽十一年春張獻忠據穀城乞撫總理熊文燦許之瑞柵以為非計謀於巡按林銘球總兵官左良王將俟其至執之文燦固執以為不可瑞柵言賊以計愚我我不可為所愚今良王及諸將賈一選周仕鳳之兵俱在近境誠合而擊之何患不捷文燦怒責以撓撫局瑞柵曰賊未創而遽撫彼將無所懼惟示以必勦之勢乃心折

不敢貳非相撓實相成也文燦不從瑞柎乃列上從征
歸農解散三策文燦亦不用瑞柎自為檄諭獻忠獻忠
恃文燦庇已不聽明年獻忠叛瑞柎先已丁憂歸獻忠
留書於壁言已之叛總理使然具列上官姓名及取賄
月日而題其末曰不納我金者王兵備一人耳由是瑞
柎名大著服闋未及用而都城陷福王時召為太僕少
卿極陳有司虐民之狀旋告歸唐王召赴福建仍故官
未幾復歸及闔地盡失溫州亦不守避之山中有欲薦

令出者乃拜辭家廟從容入室自經死

路振飛字見白曲周人天啓五年進士除涇陽知縣大吏諂魏忠賢將建祠涇陽振飛執不從邑人張問達忤奄坐追賊十萬振飛故遷延奄敗事解流賊入境擊却之崇禎四年徵授御史疏劾周延儒卑污奸險黨邪醜正祈立斥以清揆路被旨切責未幾陳時事十大弊曰務苛細而忘政體喪廉恥而壞官方民愈窮而賦愈亟有事急而無事緩知顯患而忘隱憂求治事而鮮治人

責外重而責內輕嚴於小而寬於大臣日偷而主日疑有詔旨而無奉行疏入詔付所司山東兵叛劾撫余大成孫元化且論廷儒曲庇罪帝不問已劾吏部尚書閔洪學結權勢恣私人秉銓以來吏治日壞洪學自引去廷推南京吏部尚書謝陞為左都御史振飛歷詆其醜狀陞遂不果用六年巡按福建海賊劉香數勾紅夷入犯振飛懸千金勵將士遣遊擊鄭芝龍等大破之詔賜銀幣俸滿以京卿錄用初振飛論海賊情形謂巡撫

鄒維璉不能辨語侵之維璉罷去命甫下數奏捷振飛
乃力暴其功維璉復召用八年夏帝將簡輔臣振飛言
枚卜盛典使夤緣者竊附則不光如向者周延儒溫體
仁等公論俱棄宅揆以後民窮盜興辱已者必不能正
天下時延儒已斥而體仁方居首揆銜之已而振
飛按蘓松請除輸布收銀白糧收免之四大患民
困以蘓會常熟瞿式耜為奸民張漢儒所訐體仁
坐振飛失糾擬旨令陳狀振飛語刺體仁體仁恚

激帝怒謫江南按察司檢校入為上林丞屢遷光祿少卿十六年秋擢右僉都御史總督漕運巡撫淮揚明年正月流賊陷山西振飛遣將金聲桓等十七人分道防河由徐泗宿遷至安東沭陽且團練鄉兵犒以牛酒得兩淮間勁卒數萬福周潞崇四王避賊同日抵淮大將劉澤清高傑等亦棄汎地南下振飛悉延接之四月初聞北都陷福王立於南京河南副使呂弼周為賊節度使來代振飛進士武愷為賊防禦使招撫徐沛而賊將

董學禮據宿遷振飛擊禽弼周憐走學禮竿弼周法場
命軍士人射三矢乃解磔之縛憐徇諸市鞭八十檻車
獻諸朝伏誅五月馬士英欲用所親田仰乃罷振飛振
飛亦遭母喪家無可歸流寓蘇州尋錄功即家加右副
都御史振飛初督漕謁鳳陽皇陵望氣者言高牆有天
子氣唐王聿鍵方以罪錮守陵中官虐之振飛上疏乞
槩寬罪宗竟得請

順治二年大兵破南京聿鍵自立於福州拜為左都御

史募能致振飛者官五品賜二千金振飛乃赴召道拜
太子太保吏部尚書兼文淵閣大學士至則大喜與宴
抵夜分撤燭送歸解玉帶賜之官一子職方員外郎又
錄守淮功廕錦衣世千戶王每責廷臣怠玩振飛因進
曰上謂臣僚不改因循必致敗亡臣謂上不改操切亦
未必能中興也上有愛民之心而未見愛民之政有聽
言之明而未收聽言之效喜怒輕發號令屢更見羣臣
庸下而過於督責因博覽書史而務求明備凡上所長

皆臣所甚憂也其言曲中王短云三年

大清兵進仙霞關聿鍵走汀州振飛追赴不能及汀州
破走居海島明年赴永明王召卒於途

何楷字元子漳州鎮海衛人天啓五年進士值魏忠賢
亂政不謁選而歸崇禎時授戶部主事進員外郎改刑
科給事中流賊陷鳳陽燬皇陵楷劾巡撫楊一鵬巡按
吳振纓罪而刺輔臣溫體仁王應熊言振纓體仁私人
一鵬應熊座主也逆賊犯皇陵神人共憤陛下輟講避

殿感動臣民二輔臣獨漫視之欲令一鵬振纓戴罪自贖情面重祖宗陵寢為輕朋比深天下譏刺不恤忤旨鑄一秩視事又言應熊體仁奏辯明自引門生姻婭刑官瞻徇實由於此乞宣諭輔臣毋分別恩仇以國事為戲應熊復奏辯楷言臣疏未奉旨應熊先一日撫引臣疏詞必有漏禁中語者帝意動令應熊自陳應熊竟由是去吏部尚書謝陞言登萊要地巡撫陳應元引疾宜允其去及推勞永嘉代應元則言登萊巡撫本贅員楷

亦疏駁之楷又請給贈都御史高攀龍官誥賜左光斗
諸臣謚召還惠世揚疏多見聽屢遷工科都給事中十
一年五月帝以火星逆行減膳修省兵部尚書楊嗣昌
方主款議歷引前史以進楷與南京御史林蘭友先後
言其非楷言嗣昌引建武款塞事欲借以申市賞之說
引元和田興事欲借以申招撫之說引太平興國連年
兵敗事欲借以申不可用兵之說徒巧附會耳至永平
二年馬皇后事更不知指斥安在帝方護嗣昌不聽踰

月嗣昌奪情入閣楷又劾之忤旨貶二秩為南京國子
監丞母憂歸服闋廷臣交薦召入京都城已陷福王擢
楷戶部右侍郎督理錢法命兼工部右侍郎連疏請告
不許

順治二年南都破楷走杭州從唐王入閩擢戶部尚書
鄭芝龍鴻逵兄弟橫甚郊天時稱疾不出楷言芝龍無
人臣禮王獎其風節命掌察院事鴻逵扇殿上楷楷呵
止之兩人益怒楷知不為所容連請告去途遇賊截其

一耳乃芝龍所使部將楊耿也漳州破楷遂抑鬱而卒
楷博綜羣書寒暑勿輟尤邃於經學林蘭友字翰荃仙
游人崇禎四年進士授臨桂知縣擢南京御史疏劾大
學士張至發薛國觀吏部尚書田惟嘉等因論嗣昌忠
孝兩虧貶浙江按察司照磨與楷及黃道周劉同升趙
士春稱長安五諫遷光祿署丞京師陷難髮自匿為賊
所執拷掠備至賊敗南還唐王用為太保少卿遷僉都
御史事敗挈家遁海隅十餘年卒

熊汝霖字雨殷餘姚人崇禎四年進士授同安知縣擢戶科給事中疏陳用將之失言自偏裨至副將歷任有功方可授節鉞今足未履行陣幕府已上首功胥吏提虎旅執袴子握兵符何由奮敵愾若大將之選宜召副將有功者時賜面對擇才者用之迂臣推擇有誤宜用文吏保舉連坐法帝納其言已言楊嗣昌未罪盧象昇未褒殊挫忠義氣至為嗣昌畫策練餉驅中原萬姓為盜者原任給事中沈迅也為嗣昌運籌以三千人駐襄

陽城破輒走者監紀主事俞爵也為嗣昌援引遭襄藩之陷重賂陳新甲嫁禍鄖撫袁繼咸者今解任候代之宋一鶴也皆誤國之臣宜罪不報京師戒嚴汝霖分守東直門嘗召對言將不仕戰敵南北往返謹隨其後如厮隸之於貴官負弩前驅望塵靡及何名為將何名為督師帝深然之已言有司察處者不得濫舉邊才監司察處者不得遽躡巡撫庶封疆重任不為匪人借途又言自戒嚴以來臣疏凡二十上援勸機宜百不行一而

所揣敵情不幸言中矣比者外縣難民紛紛入都皆云避兵不云避敵霸州之破敵猶不多殺掠官軍繼至始無子遺朝廷歲費數百萬金錢以養兵豈欲毒我赤子帝惡其中有飲泣地下語謫為福建按察司照磨福王立召還上疏言臣自丹陽來知浙兵為邊兵所擊火民居十餘里邊帥有言四鎮以殺掠獲封爵我何憚不為臣意四鎮必毅然北征一雪此耻今戀戀淮揚何也況一鎮之餉多至六十萬勢必不能供即倣古藩鎮法亦

當在大河以北開屯設府會與突之內而遽以藩籬視之頃之言臣竊觀目前大勢無論恢復未能即偏安尚未可必宜日討究兵餉戰守乃專在恩怨異同勲臣方鎮舌鋒筆鐸是逞近且以匿名帖逐舊臣以疏遠宗人劾宰輔中外紛紛謂將復嚴衛夫嚴衛樹威牟利小民雞犬無寧日先帝止此一節未免府怨前事不遠後事之師且先帝篤念宗藩而聞寇先逃誰死社稷先帝隆重武臣而叛降跋扈肩背相踵先帝委任勲臣而京營

銳卒徒為寇籍先帝倚任內臣而開門延敵衆口諠傳
先帝不次擢用文臣而邊才督撫誰為捍禦趙遷宰執
羅拜賊庭知前日之所以失即知今日之所以得及今
不為將待何時疏奏停俸尋補吏科右給事中初馬士
英薦阮大鍼汝霖爭不可及大鍼起佐兵部汝霖又言
大鍼以知兵用當置有用地不宜處中朝不聽踰月以
奉使陞辭言朝端議論日新宮府揣摩日熟自少宰樞
貳悉廢廷推四品監司竟晉詹尹蹊徑疊出謠詆繁興

一人未用便目滿朝為黨人一官外遷輒訾當事不可
殺置國恤於罔聞逞私圖而得志黃白充庭青紫塞路
六朝佳麗復見今時獨不思他日稅駕何地耶不報未
幾南京破士英竄杭州汝霖責其棄主士英無以應杭
州亦破與孫嘉績同起兵魯王監國擢右僉都御史督
師防江戰屢敗入海寧募兵萬人退兵部右侍郎唐王
立閩中遣劉中藻頒詔汝霖出檄嚴拒之

順治三年進兵部尚書從魯王泛海明年以本官兼東

閣大學士又明年春鄭彩憾汝霖遣兵潛害之并其幼子投海中

錢肅樂字希聲鄞縣人臨江知府若賡孫寧國知府敬忠兄子也崇禎十年成進士授太倉知州豪家奴與黠吏為奸而兇徒結黨殺人焚其屍肅樂痛懲皆斂手又以朱白榜列善惡人名械白榜者階下予大杖久之杖者曰少嘗攝崑山崇明事兩縣民皆立碑頌德遷刑部員外郎尋丁內外艱

順治二年大兵取杭州屬郡多迎降閏六月寧波鄉官
議納款肅樂建議起兵諸生華夏董志寧等遮拜肅樂
倡首士民集者數萬人肅樂乃建牙行事郡中監司守
令皆逃惟一同知治府事肅樂索取倉庫籍繕完守具
與總兵王之仁締盟共守聞魯王在台州遣舉人張煌
言奉表請監國會紹興餘姚亦舉兵王乃赴紹興行監
國事召肅樂為右僉都御史畫錢塘而守尋進右副都
御史當是時之仁及大將方國安竝加封爵其兵食用

寧波紹興台州三郡田賦不能繼恒缺食已加兵部右侍郎明年五月軍食盡悉散去魯王航海肅樂亦之舟山唐王召之甫入境王已沒遂隱海壇山採山薯為食明年魯王次長垣召為兵部尚書薦用劉沂春吳鍾鑾等明年拜肅樂東閣大學士唐王雖歿而其將徐登華為守富寧魯王遣大學士劉中藻攻之登華欲降疑未決曰海上豈有天子舟中豈有國公肅樂致書將軍獨不聞南宋之末二帝竝在舟中乎登華遂降鄭彩專柄

連殺熊汝霖鄭遵謙肅樂憂憤卒於舟故相葉向高曾
孫進晟葬之福清黃蘗山劉中藻福安人由進士官行
人賊陷京師薙髮被擄掠賊敗南還事唐王既事魯王
攻降福寧守之移駐福安

大清兵破城冠帶坐堂上為文自祭吞金屑死鄭遵謙
會稽人為諸生潞王以杭州降

大清遵謙倡衆起兵事魯王崎嶇浙閩間從王航海與
汝霖並為彩害

沈宸荃慈谿人崇禎十三年進士授行人奉使旋里福王立復命擢御史疏陳五事皆切時病已論羣臣醜正黨邪請王卧薪嘗膽為雪耻報讎之計尋薦詞臣黃道周劉同升葛世俊徐汧吳偉業等又言經畧山東河南者王永吉張縉彥也永吉失機先帝拔為總督擁兵近甸不救國危縉彥官部曹先帝驟擢典中樞乃率先從賊即加二人極刑不為過陛下屈法用之而永吉觀望逗遛縉彥狼狽南竄死何以對先帝生何以對陛下曷

平巡撫何謙失陷諸陵罪亦當按都城既陷守土臣宜
皆厲兵秣馬以報國讎乃賊塵未揚輒先去以為民望
如河道總督黃希憲山東巡撫邱祖德尚可容偃卧家
園乎疏入謙祖德等皆命逮治永吉縉彥不罪時朝政
大亂宸荃獨持正要人多疾之明年以年例出為蘇松
兵備僉事未赴南都破宸荃舉兵邑中魯王監國擢右
僉都御史已而事敗宸荃棄家從王海外王次長垣連
擢至大學士從王於舟山又從泛海抵廈門金門後艤

舟南日山遭風沒於海其邑子沈履祥嘗為知縣監國時以御史督餉台州城破避山中就獲死之

贊曰自甲申以後明祚既終不踰年而南都亦覆勢固無可為矣朱大典張國維等抱區區之義徒假名號於海濱以支旦夕而上替下陵事無統紀欲以收偏安之效何可得乎

明史卷二百七十六

欽定四庫全書

明史卷二百七十六考證

張國維傳建蘇州九里石塘及平望內外塘長洲至和
等塘修松江捍海堤濬鎮江及江陰漕渠

臣嚴福

按三吳水利明初設有專官萬厯間日就廢弛農人
竭蹶培壅收穫仍儉國維徧探河渠悉為圖說并搜
輯臣僚章奏官司案牘為三吳水利全書三十卷上
於朝見通鑑紀事謹附考

何楷傳屢遷工科給事中

臣嚴福按楷以獄訟繁興

列上定新例行久任酌分理重會審嚴斃獄革羈鋪
飭聲冤究造謗八議見通鑑紀事謹附考

明史卷二百七十六考證

附明史卷二百七十六考証後

乾隆四十一年

賜謚諸臣

張國維 專謚忠敏

張肯堂 專謚忠穆

吳鍾巒 專謚忠烈

顧咸建 唐自采 李向中 董志寧 曾櫻

朱繼祚 余煌 陳函輝 王瑞枏 熊汝霖

錢肅樂 沈宸荃

以上通謚忠節

朱大典 金應元 朱士允 朱永佑 劉世勛

張名揚 王朝相 湯芬 王祈 劉中藻

以上通謚烈愍

王道焜 高岱 葉汝菴 王景亮 伍經正

鄧巖忠 方台 張鵬異 朱養時 林璣

江用楫 董元 朱萬年 顧珍 李開國

顧中堯 蘇兆人 戴仲明 鄭遵儉 林 崱

都廷諫 洪有文 鄔正畿 林逢經 王恩及

鄭遵謙 沈履祥

以上通謚節愍

欽定四庫全書

明史卷二百七十七

大學士張廷玉等奉 敕修

列傳第一百六十五

袁繼成

張亮

金聲

江天一

邱祖德

溫璜
尹民興等

吳應箕

沈猶龍

李待問
章簡

陳子龍

夏允彝

徐孚遠

侯峒曾

閻應元等
朱集璜等

楊文總

孫臨等

陳潛夫

陸培

沈廷揚

林汝翥 林 奎

鄭為虹

黃大鵬 胡上琛

王士和 熊緯

袁繼咸字季通宜春人天啟五年進士授行人崇禎三年冬擢御史監臨會試坐縱懷挾舉子謫南京行人司副遷主客員外郎七年春擢山西提學僉事未行總理戶工二部中官張彝憲有朝覲官齎冊之奏繼咸疏論之謂此令行上自藩臬下至守令莫不次第參謁屏息低眉跪拜於中官之座率天下為無恥事大不便彝憲

大恚與繼咸互訐奏帝不聽乃子身赴任久之巡撫吳
姓薦其廉能而巡按御史張孫振以請屬不應疏証繼
咸賊私事帝怒逮繼咸責姓回奏姓賢繼咸斥孫振諸
生隨至都伏闕訴寃繼咸亦列上孫振請屬狀及其賊
賄數事詔逮孫振坐謫戍繼咸得復官十年除湖廣參
議分守武昌以兵搗江賊巢興國大冶山中禽賊首呂
瘦子降其黨千餘人詔兼僉事分巡武昌黃州擊退賊
老回回革裏眼等七大部黃陂黃安築黃岡城六千餘

丈十二年移淮陽忤中官楊顯名奏鐫二秩調用督師
楊嗣昌以其知兵引參軍事明年四月擢右僉都御史
撫治鄖陽未一年襄陽陷被逮戊貴州十五年廷臣交
薦起故官總理河北屯政未赴賊逼江西廷議設重臣
總督江西湖廣應天安慶軍務駐九江擢繼咸兵部右
侍郎兼右僉都御史以行賊已陷武昌左良玉擁兵東
下繼咸遇良玉於蕪湖激以忠義良玉即還恢復武昌
廷議呂大器來代繼咸仍督屯政大器良玉不協長沙

袁州俱陷仍推繼咸代之甫抵鎮而京師陷福王立南
都頒詔武昌良玉不拜詔繼咸致書言倫序正良玉乃
拜受詔繼咸入朝高傑新封興平伯繼咸曰封爵以勸
有功無功而封有功者不勸跋扈而封跋扈愈多王曰
事已行奈何繼咸曰馬士英引傑渡江宜令往輯王曰
彼不欲往輔臣史可法願往繼咸曰陛下嗣位固以恩
澤收人心尤宜以紀綱肅衆志乞振精神申法紀冬春
間淮上未必無事臣雖駑願奉六龍為澶淵之舉王有

難色因詣榻前密奏曰左良玉雖無異圖然所部多降將非孝子順孫陛下初登大寶人心危疑意外不可不慮臣當星馳回鎮許之因赴閤責可法不當封傑士英囁之俄陳致治守邦大計引宋高宗用黃潛善汪伯彥事語復侵士英會湖廣巡按御史黃澍劾奏士英十大罪士英擬旨逮治澍與良玉謀陰諷將士大譁欲下南京索餉保救澍繼咸為留江漕十萬石餉十三萬金給之且代澍申理以良玉依依澍為言士英不得已免逮

澍繼咸既與士英隙所奏悉停寢明年正月繼咸言元
朔者人臣拜手稱觴之日陛下嘗膽卧薪之時念大恥
未雪宜以周宣之未央問夜為可法以晚近長夜之飲
角觝之獻為可戒省土木之功節浮淫之費戒諭臣工
後私鬪而急公讐臣每歎三十年來徒以三案葛藤血
戰不已若要典一書已經先帝焚毀何必復理其說書
苟未進宜寢之即已進宜毀之至王者代興從古亦多
異同平勃迎立漢文不聞窮治朱虛之過房杜決策秦

卽不聞力究魏徵之非固其君豁達大度亦其大臣公忠善謀翊贊其美請再下寬大之詔解園扉疑入之囚斷草野株連之案王降旨俞其言羣小皆不喜繼咸汰其軍餉六萬軍中有怨言繼咸疏爭不得又以江上兵寡鄭鴻逵戰艦不還議更造檣九江僉事業士彥於江流截買材木士彥家蕪湖與諸商暱封還其檣繼咸以令不行疏劾士彥士彥同年御史黃耳鼎亦劾繼咸言繼咸有心腹將校勸左良玉立他宗良玉不從云良玉

嘗不拜監國詔聞之益疑懼上疏明與繼咸無隙耳鼎
受指使而言要典宜再焚江東人乃由是交口言繼咸
聞李自成脅制朝廷矣會都下又有偽太子之事良玉
爭不得遂與士英輩有隙繼咸疏言太子真偽非臣所
能懸揣真則望行良玉言偽則不妨從容審處多召東
宮舊臣辨識以解中外之疑疏未達良玉已反初繼咸
聞李自成兵敗南下命部將郝效忠陳麟鄧林奇守九
江自統副將汪碩畫李士元等援袁州防賊由岳州長

沙入江西境既已登舟聞良王反復還九江良王舟在北岸貽書繼咸願握手一別為皇太子死九江士民泣請繼咸往紓一方難繼咸會良王於舟中良王語及太子下獄事大哭次日舟移南岸良王袖出皇太子密諭刼諸將盟繼咸正色曰密諭何從來先帝舊德不可忘今上新恩亦不可負密諭何從來良王色變良久乃曰吾約不破城改檄為疏駐軍候旨繼咸歸集諸將於城樓而灑泣曰兵諫非正晉陽之甲春秋惡之可同亂乎

遂約與俱拒守而效忠及部將張世勲等則已出與良王合兵入城殺掠繼咸聞之欲自盡黃澍入署拜泣曰寧南無異圖公以死激成之大事去矣副將李士春亦密白繼咸隱忍至前途王文成之事可圖也繼咸以為然遂出責良王良王已疾篤夜望見城中火起大哭曰予負臨侯臨侯繼咸別號也嘔血數升遂死其子夢庚秘不發喪諸將推為帥移舟東中朝皆疑繼咸良王同反而南都時已破諸鎮多納款繼咸勸夢庚旋師不聽

遣人語林竒碩畫士元母為不忠事林竒碩畫士元避
皖湖中遣人陰逆繼咸繼咸已為效忠紹赴其軍將及
湖口而夢庚效忠降於我

大清遂執繼咸北去館內院至明年三月終不屈乃殺
之有張亮者四川人舉於鄉崇禎時歷榆林兵備參議
用薦改安廬兵備監禁軍討賊頗有功十七年擢右僉
都御史巡撫其地福王既立亮聞李自成兵敗西奔奏
言賊勢可乘請解職視賊所向督兵進討從之尋召入

京議事復遣還任明年四月左夢庚陷安慶亮被執夢
庚北行挾亮與俱乘間赴河死

金聲字正希休寧人好學工舉子業名傾一時崇禎元
年成進士授庶吉士明年十一月

大清兵逼都城聲慷慨乞面陳急務帝即召對平臺退
具疏言臣書生素矢忠義遭遇聖明日夜為陛下憂念
天下事今兵逼京畿不得不急為君父用夫通州昌平
都城左右翼宜戍以重兵而天津漕艘所聚尤宜亟防

今天下草澤之雄欲效用國家者不少在破格用之耳
臣所知申甫有將才臣願仗聖天子威靈與練敢戰士
為國家捍強敵惟陛下立賜裁許申甫者僧也好談兵
方私製戰車火器帝納聲言取其車入覽授都司僉事
即日召見奏對稱旨超擢副總兵教募新軍便宜從事
改聲御史參其軍甫倉猝募數千人皆市井游手所需
軍裝戎器又不時給而是時

大清兵在郊圻久勢當速戰急出營柳林總理滿桂節

制諸軍甫不肯為下桂卒掠民間甫軍捕之桂輒索去聲以兩軍不和聞帝即命聲調護亡何桂歿甫連敗於柳林大井乃結車營盧溝橋

大清兵遠出其後御車者惶懼不能轉殲戮殆盡甫亦陣亡聲痛傷之言甫受事日淺直前衝鋒遺骸矢刃殆徧非喋血力戰不至此帝亦傷之命予恤典聲恥無功請率參將董大勝兵七百人甫遺將古壁兵百人及豪傑義從數百人練成一旅為劉之綸奇兵收桑榆之效

不許俄以清核軍需告竣奏繳關防請按律定罪再疏
請罷斥皆不許東江自毛文龍被殺兵力弱勢孤聲因
東宮冊立自請頒詔朝鮮俾聯絡東江張海外形勢帝
雖嘉其意亦不果用尋上疏言陛下晝夜焦勞日親天
下之事實未嘗日習天下之人必使天下才不才及才
長短一一程量不爽方可斟酌位置往者陛下數召對
羣臣問無所得鮮當聖心遂厭薄之臣愚妄謂陛下泰
交尚未殷顧問尚未數不得謂召對無益也願自今間

日御文華令京卿翰林臺諫及中行評博等官輪番入直博咨廣詢而內外有職業者亦得不時進見政事得失軍民利病廟堂舉錯邊塞情形皆與臣工考究於燕閒之間歲月既久品量畢呈諸臣才不才及才長短豈得逃聖鑒帝未及報聲再疏懇言之終不用遂屢疏乞歸後大學士徐光啟薦聲同修厯書辭不就以御史召亦不赴八年春起山東僉事復兩疏力辭鄉郡多盜聲團練義勇為捍禦十六年鳳陽總督馬士英遣使者李

章王徵貴州兵討賊迂道掠江西為樂平吏民所拒擊
比抵徽州境吏民以為賊率衆破走之章王諱激變謂
聲及徽州推官吳翔鳳主使士英以聞聲兩疏陳辨帝
察其無罪不問其年冬廷臣交薦即命召用促入都陛
見未赴而京師陷福王立於南京起擢聲左僉都御史
聲堅不起

大清兵破南京列郡望風迎降聲糾集士民保績溪黃
山分兵扼六嶺寧國邱祖德徽州溫璜貴池吳應箕等

多應之乃遣使通表唐王授聲右都御史兼兵部右侍郎總督諸道軍拔旌德寧國諸縣九月下旬徽故御史黃澍降於

大清

王師間道襲破之聲就執至江寧語門人江天一曰子有老母不可死對曰天一同公起兵可不同公殉義乎遂偕死唐王贈聲禮部尚書謚文毅天一歛諸生

邱祖德字念修成都人崇禎十年進士授寧國推官以

才調濟南用薦超擢僉事分巡東昌山東土寇猖獗帝因給事中張元始言令祖德及東兗道李恪專任招撫寇多解散十五年調官沂州其冬用兵部尚書張國維薦擢右僉都御史巡撫保定十六年星察典解職候勘事白以故官代王永吉撫山東京師覆賊遣使招降祖德斬之謀發兵拒守會中軍梅應元叛率部卒索印祖德乃南奔福王時御史沈宸荃劾祖德及河南總督黃希憲輕棄封疆詔削籍提訊久之獲釋而成都亦陷無

家可歸流寓寧國金聲起兵績溪祖德與寧國舉人錢
丈龍諸生麻三衡沈壽堯等各舉兵應之時郡城已失
祖德駐華陽三衡駐稽亭他蠡起者又十餘部約共攻
郡城不克壽堯陣歿祖德退還山中

大清兵攻拔其寨就獲磔死其子亦死越四日三衡軍
敗亦死壽堯都督有容子三衡布政使溶孫也三衡兵
既起旁近吳太平阮恒阮善長劉鼎甲胡天球馮百家
與俱起號七家軍皆諸生也三衡既敗太平等亦死溫

璜初名以介字于石烏程人大學士體仁再從弟也母
陸守節被旌璜久為諸生有學行崇禎十六年秋舉進
士授徽州推官甫蒞任聞京師陷亟練民兵為保障計
明年南京亦覆知府秦祖襄及諸僚屬皆遁璜乃盡攝
其印召士民慰諭之金聲舉兵績溪璜與犄角且轉餉
給其軍而徙家屬於村民舍未幾聲敗璜嚴兵自守郡
中故御史黃澍以城獻璜趨歸村舍刃其妻茅氏及長
女遂自剄死吳應箕字次尾貴池人善今古文意氣橫

厲一世阮大鍼以附璫削籍僞居南京聯絡南北附璫
失職諸人劫持當道應箕與無錫顧景桐城左國材蕪
湖沈士柱餘姚黃宗羲長洲楊廷樞等為留都防亂公
揭討之列名者百四十餘人皆復社諸生也後大鍼得
志謀殺周鑣應箕獨入獄護視大鍼聞急遣騎捕之應
箕夜亡去南都不守起兵應金聲敗走山中見獲慷慨
就死其同時舉兵者有尹民興吳漢超龐昌允謝球司
石磐王湛魯之與民興字宣子崇禎初舉進士歷知寧

國涇二縣除奸釐蠹有神明之稱行取入都為陳啟新
所訐謫福建按察司檢校十五年春疏陳時務十四事
帝喜召為職方主事數召對言多當帝意即擢本司郎
中周延儒出督師命從軍贊畫延儒被譴下民興吏除
名久之始釋福王立起故官尋謝病歸流寓涇縣南京
失與諸生趙初浣等據城拒守

大清兵攻破城初浣死之民興走免唐王以為御史事
敗歸卒於家漢超宣城諸生崇禎十七年聞都城變謀

募兵赴難會福王立乃已明年南都覆棄家走涇縣從
尹民興起兵兵敗匿華陽山中先是邱祖德麻三衡諸
軍潰保華陽有徐淮者部署之漢超與合連取句容漂
水高淳漂陽涇太平諸縣明年正月襲寧國夜緣南城
登兵潰城中按首事者漢超已出城念母在且恐累族
人入見曰首事者我也剖其腹膽長三寸妻戚自擲樓
下死昌允西充人崇禎十年進士授青陽知縣南京覆
走匿九華山謀舉兵事洩就執夜死旅店中球漂陽諸

生僉事鼎新子也毀家募兵兵散見執而死石磐鹽城
諸生與都司鄧某同舉兵兵敗就執鄧言此儒生吾劫
之為書記耳石磐曰吾首事奈何諱之繫獄六十餘日
與鄧偕死湛太倉諸生城已下與兄淳復集里人數百
圍城城中兵出擊淳赴水死湛被斫死之璵歷官副總
兵駐福山蘇州既降諸生陸世鑰聚衆焚城樓之璵率
千人入城與

大清兵戰潰走之璵戰死其時以諸生死者有六合馬

純仁邳州王台輔南京既下六合即歸附純仁題銘橋
柱抱石投水死台輔當崇禎末聞宦官復出鎮將草疏
極諫甫入都都城陷乃還福王時東平伯劉澤清御史
王燮張樂大宴於睢寧台輔衰經直入責之曰國破君
亡此公等卧薪嘗膽食不下咽時顧置酒大會耶左右
欲鞭之燮曰狂生也命引去及南京覆台輔視其廩曰
此吾所樹盡此死明年粟盡北面再拜自縊死

沈猶龍字雲升松江華亭人萬厯四十四年進士除鄞

縣知縣天啟初徵授御史出為河南副使崇禎元年召復故官進太僕少卿拜右僉都御史巡撫福建江西妖賊張普薇等作亂猶龍遣遊擊黃斌卿協勦大破之增秩賜金以憂歸服闋起兵部右侍郎兼右僉都御史總督兩廣軍務兼廣東巡撫十七年冬福王召理部事不就乞葬親歸明年南京失守列城望風下閏六月吳淞總兵官吳志葵自海入江結水寨於泖湖會總兵官黃蜚擁千艘自無錫至與合猶龍乃偕里人李待問章簡

等募壯士數千人守城與二將相犄角而參將侯承祖
守金山八月

大清兵至二將敗於春申浦城遂受圍未幾破猶龍出
走中矢死待問守東門簡守南門城破俱見殺華亭教
諭睦明永題詩明倫堂投繯死諸生戴泓赴池死嘉定
舉人傅凝之參志葵軍事兵敗赴水死

大清兵遂攻金山承祖與子世祿猶固守城既破巷戰
踰時世祿中四十矢就獲死之承祖亦就獲說之降不

從遂見殺志葵輩既敗執至江陰城下令說城中人降
志葵說之輩不語城迄不下後皆被殺待問字存我崇
禎末進士授中書舍人工文章兼精書法簡字坤能舉
於鄉官羅源知縣

陳子龍字卧子松江華亭人生有異才工舉子業兼治
詩賦古文取法魏晉駢體尤精妙崇禎十年進士選紹
興推官東陽諸生許都者副使達道孫也家富任俠好
施陰以兵法部勒賓客子弟思得一當子龍嘗薦諸上

官不用東陽令以私憾之適義烏奸人假中官名招兵
事發都癸母山中會者萬人或告監司王雄曰都反矣
雄遽遣使收捕都遂反旬日間聚衆數萬連陷東陽義
烏浦江遂逼都城既而引去巡撫董象恒坐事逮代者
未至巡按御史左光先以撫標兵命子龍為監軍討之
稍有俘獲而遊擊蔣若來破其犯郡之兵都乃率餘卒
三千保南砦雄欲撫賊語子龍曰賊聚糧據險官軍不
能仰攻非曠日不克我兵萬人止五日糧奈何子龍曰

都舊識也請往察之乃單騎入都營責數其罪諭令歸降待以不死遂挾都見雄復挾都走山中散遣其衆而以二百人降光先與東陽令善竟斬都等六十餘人於江潁子龍爭不能得以定亂功擢兵科給事中命甫下而京師陷乃事福王於南京其年六月言防江之策莫過水師海舟議不可緩請專委兵部主事何剛訓練從之太僕少卿馬紹愉奉使陞見語及陳新甲主款事王曰如此新甲當恤廷臣無應者獨少詹事陳盟曰可因

命予恤且追罪嘗劾新甲者廷臣懲劉孔昭殿上相爭
事不敢言子龍與同官李清交章力諫事獲已未幾列
上防守要策請召還故尚書鄭三傑都御史易應昌房
可壯孫晉並可之又言中使四出搜巷凡有女之家黃
紙貼額持之而去閭井騷然明旨未經有司中使私自
搜採甚非法紀乃命禁訛傳誑惑者子龍又言中興之
主莫不身先士卒故能光復舊物今入國門再旬矣人
情泄省無異昇平清歌漏舟之中痛飲焚屋之內臣不

知其所終其始皆起於姑息一二武臣以至凡百政令皆因循遵養臣甚為之寒心也亦不聽明年二月乞終養去子龍與同邑夏允彝皆負重名允彝死子龍念祖母年九十不忍割遁為僧尋以受魯王邵院職銜結太湖兵欲舉事事露就獲乘間投水死夏允彝字彝仲弱冠舉於鄉好古博學工屬文是時東林講席盛蘇州高才生張溥楊廷樞等慕之結文會名復社允彝與同邑陳子龍徐孚遠王光承等亦結幾社相應和崇禎十年

與子龍同成進士授長樂知縣善決疑獄他郡邑不能
決者上官多下長樂居五年邑大治吏部尚書鄭三傑
舉天下廉能知縣七人以允彞為首帝召見大臣方岳
貢等力稱其賢將特擢會丁母憂未及用北都變聞允
彞走謁尚書史可法與謀興復聞福王立乃還其年五
月擢吏部考功司主事疏請終制不赴御史徐復陽希
要人旨劾允彞及其同官文德翼居喪授職為非制以
兩人皆東林也兩人實未嘗赴官無可罪吏部尚書張

捷遽議取秩調用未幾南都失徬徨山澤間欲有所為
聞友人侯峒曾黃淳耀徐汧等皆死乃以八月中賦絕
命詞自投深淵以死允彝死後二年子完淳兄之旭竝
以陳子龍獄詞連及亦死而同社徐孚遠舉於鄉因松
江破遁入海死於島中

侯峒曾字豫瞻嘉定縣人給事中震暘子也天啟五年
成進士授南京武選司主事丁父憂崇禎七年入都兵
部尚書張鳳翼薦為職方郎中峒曾力辭乃改南京文

選司主事由稽勲郎中遷江西提學參議給事中耿始
然督賦至他監司以屬禮見峒曾獨與抗禮益王勢方
熾歲試黜兩宗生王怒使人誚讓峒曾不為動遷廣東
副使不赴起浙江右參政分守嘉湖漕卒擊傷秀水知
縣李向中峒曾請於撫按捕戮首惡部內肅然吏部尚
書鄭三俊舉天下賢能監司五人峒曾與焉名為順天
府丞未赴而京師陷福王時用為左通政辭不就及南
京覆州縣多起兵自保嘉定士民推峒曾為倡偕里人

黃淳耀張錫眉董用圓馬元調唐全昌夏雲蛟等誓死固守

大清兵來攻峒曾乞師於吳淞總兵官吳志葵志葵遣遊擊蔡祥以七百人來赴一戰失利束甲遁外援遂絕城中矢石俱盡七月三日大雨城隅崩架巨木支之明日雨益甚城大崩

大清兵入峒曾拜家廟挈二子元演元潔竝沈於池錫眉用圓元調全昌雲蛟皆死之錫眉用圓皆舉人用圓

官秀水教諭元調全昌雲蛟竝諸生其時聚衆城守而死者有江陰閻應元崑山朱集璜之屬應元字麗貞順天通州人崇禎中為江陰典史十七年海賊顧三麻入黃田港應元往禦手射殺三人賊退以功遷英德主簿道阻不赴寓居江陰明年五月南京亡列城皆下閏六月朔諸生許用倡言守城遠近應者數萬人典史陳明遇主兵用徽人邵康公為將而前都司周瑞龍泊江口相犄角戰失利

大清兵逼城下徽人程壁盡散家貲充餉而身乞師於吳淞總兵官吳志葵志葵至壁遂不返康公戰不勝瑞龍水軍亦敗去明遇乃請應元入城屬以兵事

大清兵力攻城應元守甚固東平伯劉良佐用牛皮帳攻城東北城中用礮石力擊良佐乃移營十方庵令僧陳利害良佐旋策馬至應元誓以大義屹不動及松江破

大清兵來益衆四圍發大礮城中死傷無算猶固守八

月二十一日

大清兵從祥符寺後城入衆猶巷戰男婦投池井皆滿
明遇用皆舉家自焚應元赴水被曳出死之訓導馮厚
敦冠帶縊於明倫堂娣及妻王結衽投井死里居中書
舍人戚勲令妻及子女子婦先縊乃舉火自焚從死者
二十人舉人夏維新諸生王華呂九韶自刎死貢生黃
毓祺者好學有盛名精釋氏學與門人徐趨舉兵行塘
以應城內兵及城陷兩人逸去明年冬趨偵江陰無備

率壯士十四人襲之不克皆死毓祺既逸去避江北其子大湛大洪被收兄弟方爭死而毓祺以敕印事發逮繫江寧獄將刑其門人告之期命取襲衣自斂跌坐而逝朱集璜字以發崑山貢生學行為鄉里所推教授弟子數百人南京既亡崑山議拒守而縣丞閻茂才已遣使迎降縣人共執殺茂才以六月望推舊將王佐才為帥集璜及周室瑜陶琰陳大任等共舉兵參將陳宏鄖前知縣楊永言率壯士百人為助佐才亦邑人嘗官狼

山副總兵年老矣

大清兵至宏勛率舟師迎戰敗還遊擊孫志尹戰歿城破永言遁去佐才縱民出走而已冠帶坐帥府見殺集璜投東禪寺後河死門人孫道民張謙同日死室瑜琰大任亦死之室瑜子朝鑛大任子思翰皆同死室瑜舉於鄉官儀封知縣琰大任皆諸生時以守禦死者蘇達道莊萬程陸世鏜陸雲將歸之甲周復培陸彥冲代父死者沈徵憲朱國軾救母死者徐洺自盡者徐澥王在

中吳行貞

楊文驄字龍友貴陽人浙江參政師孔子萬厯未舉於鄉崇禎時官江寧知縣御史詹兆恒劾其貪污奪官候訊事未竟福王立於南京文驄戚馬士英當國起兵部主事歷員外郎郎中皆監軍京口以金山踞大江中控制南北請築城以資守禦從之文驄善書有文藻好交遊于士英者多緣以進其為人豪俠自喜頗推獎名士士亦以此附之明年遷兵備副使分巡常鎮二府監大

將鄭鴻逵鄭彩軍及

大清兵臨江文驄駐金山扼大江而守五月朔擢右僉都御史巡撫其地兼督沿海諸軍文驄乃還駐京口合鴻逵等兵南岸與

大清兵隔江相持

大清兵編大筏置燈火夜放之中流南岸軍發礮石以爲克敵也日奉捷初九日

大清兵乘霧潛濟迫岸諸軍始知倉皇列陣甘露寺鐵

騎衝之悉潰文驄走蘇州十三日

大清兵破南京百官盡降命鴻臚丞黃家鼎往蘇州安撫文驄襲殺之遂走處州時唐王已自立於福州矣初唐王在鎮江時與文驄交好至是文驄遣使奉表稱賀鴻達又數薦乃拜兵部右侍郎兼右僉都御史提督軍務令圖南京如其子鼎御左都督太子太保鼎卿士英甥也士英遣迎福王遇王於淮安王貧窶甚鼎卿賙給之王與定布衣交以故寵鼎卿甚及鼎卿上謁王以故

人子遇之獎其父子擬以漢朝大小耿然其父子以士
英故多為人詆譏明年衢州告急誠意伯劉孔昭亦駐
處州王令文驄與共援衢七月

大清兵至文驄不能禦退至浦城為追騎所獲與監紀
孫臨俱不降就戮臨字武公桐城人兵部侍郎晉之弟
文驄招入幕奏為職方主事竟與同死其時起兵旁掠
郡縣者有吳易字日生吳江人生有膂力跡弛不羈崇
禎末成進士福王時謁史可法於揚州可法異其才題

授職方主事為已監軍明年奉檄徵餉江南未還而揚
州失已而吳江亦失易走太湖與同邑舉人孫兆奎諸
生沈自駟自炳武進吳福之等謀舉兵旬日得千餘人
屯於長白蕩出沒旁近諸縣道路為梗唐王聞之授兵
部右侍郎兼右僉都御史總督江南諸軍文驄奏易斬
獲多進為兵部尚書魯王亦授易兵部侍郎封長興伯
八月

大清兵至易遂敗走父承緒妻沈及女皆投水死自駟

自炳福之亦死焉兆奎就獲一軍盡殲明年易鄉人周瑞復聚衆長白蕩迎易入其營八月事洩就獲死之福之鍾巒子也兆奎兵敗時慮易妻女被辱視其死而後行故見獲械至江寧死之

陳潛夫字元倩錢塘人家貧落魄好大言以賊俗崇禎九年舉於鄉益廣交遊為豪舉好藏否人里中人惡之友人陸培兄弟為文逐潛夫潛夫乃避居華亭十六年冬授開封推官大河南五郡盡為賊據開封被河灌城

虛無人長吏皆寄居封邱有勸潛夫弗往者不聽馳之
封邱會叛將陳永福率賊兵出山西其子德為巡撫秦
所式部將縛巡按御史蘇京去潛夫募民兵千請於所
式及總兵卜從善許定國令共勦皆不肯行潛夫乃以
十七年正月奉周王渡河居杞縣檄召旁近長吏設高
皇帝位歃血誓固守賊所設偽巡撫梁啟隆居開封他
偽官散布郡邑間甚衆而開封東西諸土寨剽掠公行
相攻殺無已潛夫轉側杞陳留間朝夕不自保聞西平

寨副將劉洪起勇而好義屢殺賊有功躬往說之五月五日方誓師而都城失守報至乃慟哭令其下縞素洪起兵萬數號五萬潛夫兵三千俘杞偽官啟聞風遁去遂渡河而北大破賊將陳德於柳園時李自成已敗走山西而南陽賊乘間犯西平洪起引還潛夫亦隨而南福王立南京潛夫傳露布至朝中大喜即擢監軍御史巡按河南潛夫乃入朝言中興在進取王業不偏安山東河南地尺寸不可棄豪傑結寨自固者引領待官軍

誠分命藩鎮以一軍出潁壽一軍出淮徐則衆心競奮
爭為我用更頒爵賞鼓舞計遠近畫城堡俾自守而我
督撫將帥屯銳師要害以策應之寬則耕屯為食急則
披甲乘墉一方有警前後救援長河不足守也汴梁一
路臣聯絡素定旬日可集十餘萬人誠稍給糗糧容臣
自將臣當荷戈先驅諸藩鎮為後勁河南五郡可盡復
五郡既復畫河為固南連荆楚西控秦關北臨趙衛上
之則恢復可望下之則江淮永安此今日至計也兩淮

之上何事多兵督撫紛紜竝為虛設若不思外拒專事
退守舉土地甲兵之衆致之他人臣恐江淮亦未可保
也當是時開封汝寧間列寨百數洪起最大南陽列寨
數十蕭應訓最大洛陽列寨亦數十李際遇最大諸帥
中獨洪起欲效忠潛夫請予挂印為將軍馬士英不聽
而用其姻婭越其杰巡撫河南潛夫自九月入覲便道
省親甫五日即馳赴河上所建白皆不用諸鎮兵無至
者其杰老憊不知兵兵部尚書張縉彥總督河南山東

軍務止提空名不能馭諸將其冬應訓復南陽及泌陽
舞陽桐柏遣子三傑獻捷潛夫投告身飲之酒鼓吹旌
旗前導出三傑喜過望往謁其杰其杰故為尊嚴厲辭
詰責詆為賊三傑泣而出萌異心潛夫過諸寨皆饒吹
送迎其杰間過之諸寨皆閉門不出其杰恚譖潛夫於
士英士英怒冬盡召潛夫還以淩駟代潛夫亦遭外艱
歸明年三月給事中林有本疏劾御史彭遇甌竝及潛
夫士英以遇甌已私入置不問獨令議潛夫罪先是有

童氏者自言福王繼妃廣昌伯劉良佐具禮送之潛夫
至壽州見車馬騶從傳呼皇后来亦稱臣朝謁及童氏
入都王以為假冒下之獄遂責潛夫私謁妖婦逮下獄
治之未幾南都不守潛夫得脫歸聞魯王監國紹興渡
江往謁命復故官加太僕少卿監軍乃自募三百人列
營江上尋進大理寺少卿兼御史如故

順治三年五月晦江上師盡潰潛夫走至山陰化龍橋
偕妻妾二孟氏同赴水死年三十七始為文遂潛夫者

聞潞王又降以繩授二僕從容就縊而死年二十九培
少負俊才有文名行誼修謹客華亭嘗却奔女於室云
沈廷揚字季明崇明人好談經濟崇禎中由國子生為
內閣中書舍人十二年冬帝以山東多警運道時梗議
復海運廷揚生海濱習水道上疏極言其便且輯海運
書五卷以呈帝喜即命造海舟試之廷揚乘二舟由淮
安出海抵天津僅半月帝大喜即加戶部郎中往登州

與巡撫徐人龍計海運事初寧遠軍餉率用天津船自
登州候東南風轉粟至天津又候西南風轉至寧遠廷
揚請從登州直達寧遠帝用其議省費多十五年命再
赴淮安督海運事竣加光祿少卿仍領其事及京師陷
福王命廷揚以海舟防江尋命兼理餉務覬江北諸軍
南京失守走還鄉里後航海至舟山依黃斌卿唐王在
福建授兵部右侍郎總督水師魯王授官亦如之魯王
航海之明年廷揚督舟師北上抵福山次鹿苑夜分覬

風大作舟膠於沙為

大清兵所執諭之降不從乃就戮

林汝翥字大藏福清人舉於鄉授沛縣知縣天啟二年

戰却徐鴻儒兵緝妖人王普光黨有功持擢御史四年

六月巡視京城民曹大妻與人奴角口服毒死火者曹

進傳國興率眾大掠奴主家用大錐錐其主刑官不敢

問汝翥捕得進進懼劾請受杖遂杖之五十國興邀於

道罵不已汝翥收繫之亦請受杖復杖之魏忠賢大怒

立傳旨廷杖汝翦先數日羣奄毆殺之璟汝翦大懼逸
至遵化巡撫鄧漢為代題都御史孫瑋御史潘雲翼等
交章論救不聽卒杖之削籍歸崇禎初起故右參議分
守溫處道不赴久之起瓊州遵坐奸民煽亂貶秩歸福
王時起雲南僉事已而解職魯王次長垣召為兵部右
侍郎與員外郎林塗攻福寧戰敗就執諭降不從繫之
吞金屑而死塗字子野汝翦同邑人崇禎十六年進士
授海寧知縣邑有妖人以劍術惑衆聚千人塗捕殺之

南都覆杭州亦不守卒乘機乞餉環署大譟盜罪為首者而如其請以城孤不能存引去唐王以為御史改文選員外郎募兵福寧聞王被殺大慟走匿山中及魯王航海至長垣福清鄉兵請盜為主與汝蕭共攻城歿於陣

鄭為虹字天玉江都人崇禎十六年進士除浦城知縣唐王道浦城知其廉及自立召為御史部民相率乞留有十不可去之疏乃令以御史巡視仙霞關駐浦城尋

令巡撫上遊四府兼領關務鄭芝龍步將奪民舟為虹
叱責之芝龍訴於王王為諭解然是時芝龍已懷異志
盡撤守關將仙霞嶺二百里間無一人

順治三年八月

大清兵長驅直入為虹亟還浦城縱士民出走自守空
城無何就執與給事中黃大鵬竝死之年二十有五大
鵬字文若建陽人崇禎十三年進士為義烏知縣有能
聲唐王召為兵科給事中從至建寧令與為虹共守仙

霞嶺竟同死時王在延平聞仙霞關失守倉猝走汀州
守延平者為王士和從走汀州者有胡上琛熊瑋皆以
死事著士和字萬璟金谿人崇禎中舉於鄉南京既覆
江西亦被兵士和避入閩授吏部司務疏陳時政關失
凡數千言唐王刊賜文武諸臣且召士和入對嘉獎備
至擢兵部主事未一月擢延平知府八月王走汀州留
兵部侍郎曹履泰偕士和居守俄警報疊至士和召父
老曰吾雖一月郡守當與城存亡若等可速出毋使數

萬生靈盡膏斧鎖衆泣士和亦泣退入內署謂友人曰
吾一介書生數月而泰二千石安敢偷生其友勸止之
正色曰君子愛人以德姑息何為從容正衣冠閉戶投
綬死上琛字席公世襲福州右衛指揮使好讀書能詩
既襲職復舉武鄉試時王時官錦衣衛指揮遷署都督
僉事充御營總兵官從至汀州王見執上琛奔還福州
謂家人曰吾世臣不可苟活為我採毒草來妾劉年二
十願同死上琛喜曰汝幼婦亦能死耶遂整冠帶與妾

共飲藥酒而卒緯字文江南昌人崇禎十六年進士授
行人兩京既覆每飲酒輒涕泗交橫下友人語之曰昔
狼曠有言吾未獲死所子既有志曷求所乎乃赴延平
謁唐王擢給事中尋扈行至汀州遣變從官皆散緯仍
奔赴遇

大清兵死之

贊曰廢興之故豈非天道哉金聲等以烏合之師張皇
奮呼欲挽明祚於已廢之後心離勢渙敗不旋踵何足

寸之能補然卒能致命遂志視死如歸事雖無成亦存
其志而已矣

明史卷二百七十七

欽定四庫全書

明史卷二百七十七考證

索繼咸傳彛憲大憲與繼咸互訐奏

臣嚴福按彛憲

奏辯謂覲官叅謁乃尊朝廷繼咸復言尊朝廷莫大於典例知府見藩臬行屬禮典例也見內臣行屬禮亦典例乎諸司至京投冊吏部典例也先謁內臣亦典例乎事本典例雖坐受猶以為安事創彛憲即長揖祇增其辱高皇帝立法內臣不得與外事若必以

內臣繩外臣會典所不載上仍切責之見通鑑紀事

謹附考

邱祖德傳行取入都為陳啟新所訐謫福建按察司檢

校

臣

嚴福按十二年陳啟新疏論考選又進吏部

訪冊禮部尚書姜逢元兵部尚書王業浩獨園多上

嫌其濫俱罷官啟新遂叅知縣尹民興等俱降調見

通鑑紀事謹附考

陳潛夫傳陸培字庭鯤舉進士

臣

嚴福按培仁和人

崇禎十三年進士見題名錄謹附考

林汝翥傳廷杖汝翥

臣

嚴福按汝翥與大學士葉向

高同鄉魏忠賢欲借之以傾向高會汝翥以廷杖逸去羣奄疑向高匿之索其寓辱及婦女向高奏之置不問見通鑑紀事謹附考

明史卷二百七十七考證

附明史卷二百七十七考証後

乾隆四十一年

賜謚諸臣

袁繼咸 專謚忠毅

陳子龍 專謚忠裕

邱祖德 溫璜 沈猶龍 侯承祖 閻應元

鄭為虹

以上通謚忠烈

張亮 金聲 吳應箕 李待問 夏允彝

侯峒曾 陳潛夫 陸培 沈廷揚 林汝翥

以上通謚忠節

申甫 陳明遇 孫志尹 戚勳 王佐才

林塗 黃大鵬 熊緯

以上通謚烈愍

江天一 龐昌允 鄧某 魯之璜 章簡

馮厚敦 周室瑜 孫臨 吳易 王士和

胡上琛

以上通謚節愍



